

სსიპ - ივანე ჯავახიშვილის სახელობის თბილისის სახელმწიფო უნივერსიტეტის წარმომადგენლობითი საბჭოს მიერ დამტკიცებული ჰუმანიტარულ მეცნიერებათა ფაკულტეტის დებულებაში ცვლილების შეტანის თაობაზე

„უმაღლესი განათლების შესახებ“ საქართველოს კანონის 28-ე მუხლის „დ“ პუნქტის, საქართველოს განათლებისა და მეცნიერების მინისტრის 2013 წლის 11 სექტემბრის N135/ნ ბრძანებით დამტკიცებული საჯარო სამართლის იურიდიული პირის - ივანე ჯავახიშვილის სახელობის თბილისის სახელმწიფო უნივერსიტეტის წესდების მე-11 მუხლის პირველი პუნქტის „დ“ ქვეპუნქტის, სსიპ - ივანე ჯავახიშვილის სახელობის თბილისის სახელმწიფო უნივერსიტეტის ჰუმანიტარულ მეცნიერებათა ფაკულტეტის საბჭოს 2018 წლის 9 თებერვლის გადაწყვეტილების საფუძველზე, შევიდეს შემდეგი ცვლილებები ივანე ჯავახიშვილის სახელობის თბილისის სახელმწიფო უნივერსიტეტის წარმომადგენლობითი საბჭოს მიერ დამტკიცებულ ჰუმანიტარულ მეცნიერებათა ფაკულტეტის დებულებაში:

1. დებულების მე-3 მუხლის „ა“ ქვეპუნქტი ჩამოყალიბდეს შემდეგი რედაქციით:
„ა) თანამედროვე სტანდარტების შესატყვისი და ხელმისაწვდომი განათლების მიღების შესაძლებლობის უზრუნველყოფა; კონკურენტუნარიანი და მაღალკვალფიციური სპეციალისტების მომზადება სწავლების საბაკალავრო, სამაგისტრო და სადოქტორო საფეხურებზე, ასევე, სხვა, მათ შორის პროფესიული განათლებისა და ქართულ ენაში მომზადების საგანმანათლებლო პროგრამების განხორციელება“;
2. დებულების მე-4 მუხლის მე-5 პუნქტი ჩამოყალიბდეს შემდეგი რედაქციით:
„5. ფაკულტეტის დამხმარე სტრუქტურული ერთეულებია: ფაკულტეტის სასწავლო პროცესის მართვის სამსახური, სამეცნიერო კვლევებისა და განვითარების სამსახური, რესურსების მართვის სამსახური, სტუდენტთა მომსახურების ცენტრი, კანცელარია, კომპიუტერული ცენტრი.“;
3. დებულების მე-4 მუხლის მე-9 პუნქტი ჩამოყალიბდეს შემდეგი რედაქციით:
„9. დადგენილი წესის შესაბამისად ფაკულტეტზე იქმნება: ფაკულტეტის სადისერტაციო საბჭო, კრედიტების აღიარების საფაკულტეტო კომისია და საატესტაციო კომისია.“;
4. დებულების მე-6 მუხლის მე-4 პუნქტი ჩამოყალიბდეს შემდეგი რედაქციით:
„4. ჰუმანიტარულ მეცნიერებათა ფაკულტეტის საბჭო შედგება 38 წევრისაგან. ფაკულტეტის საბჭოში აირჩევა აკადემიური პერსონალი ფაკულტეტზე არსებული

სასწავლო-სამეცნიერო ინსტიტუტებიდან. ფაკულტეტის საბჭოში შედიან დეკანი და სტუდენტთა თვითმმართველობის წარმომადგენლები. ფაკულტეტის საბჭოში სტუდენტთა თვითმმართველობის წარმომადგენელთა რაოდენობა არ შეიძლება იყოს საბჭოს შემადგენლობის $\frac{1}{4}$ -ზე ნაკლები.“

5. დებულების მე-7 მუხლს დაემატოს შემდეგი შინაარსის მქონე „ჟ¹-ჟ⁵“ ქვეპუნქტები:

„ჟ¹) ქმნის სწავლებისა და კვლევის ხარისხის უზრუნველყოფის მექანიზმს;

ჟ²) მაგისტრანტობის კანდიდატებისთვის შეიმუშავებს უმაღლესი საგანმანათლებლო დაწესებულების მიერ განსაზღვრული გამოცდის/გამოცდების ჩატარების წესს საქართველოს განათლებისა და მეცნიერების მინისტრის ბრძანებით დადგენილი წესის შესაბამისად;

ჟ³) სამაგისტრო საგანმანათლებლო პროგრამის განხორციელების მიზნით განსაზღვრავს სპეციალობის/სპეციალობების ჩამონათვალს საგანმანათლებლო პროგრამული მიმართულებების ფარგლებში;

ჟ⁴) სასწავლო წლის დასაწყისში განსაზღვრავს კოეფიციენტებს ერთიანი ეროვნული გამოცდისათვის;

ჟ⁵) დეკანის წარდგინებით ამტკიცებს საატესტაციო კომისიას.“

6. დებულების მე-15 მუხლს დაემატოს შემდეგი შინაარსის მქონე მე-6 პუნქტი:

„6. ფაკულტეტის ხარისხის უზრუნველყოფის სამსახური ახორციელებს ფაკულტეტის საგანმანათლებლო პროგრამების კურსდამთავრებულებთან კომუნიკაციას, რაც გულისხმობს ფაკულტეტის საგანმანათლებლო პროგრამების განვითარებაში მათ მონაწილეობას და სხვ.“

7. დებულების მე-16 მუხლის პირველი პუნქტი ჩამოყალიბდეს შემდეგი რედაქციით:

„1. ჰუმანიტარულ მეცნიერებათა ფაკულტეტის ხარისხის უზრუნველყოფის სამსახურის სტრუქტურა ითვალისწინებს: ფაკულტეტის ხარისხის უზრუნველყოფის სამსახურის ხელმძღვანელს (შემდგომში „უფროსი“), სამსახურის წევრებსა და დამხმარე პერსონალს.“

8. დებულების მე-18 მუხლს დაემატოს შემდეგი შინაარსის მქონე მე-3 პუნქტი:

„3. ფაკულტეტის ხარისხის უზრუნველყოფის სამსახურის ხელმძღვანელისათვის წასაყენებელ მოთხოვნებს განსაზღვრავს უნივერსიტეტი.“

9. დებულების მე-6 თავის სათაური ჩამოყალიბდეს შემდეგი რედაქციით:
„თავი VI
ფაკულტეტის სადისერტაციო საბჭო და საატესტაციო კომისია“

10. დებულების 21-ე მუხლი ჩამოყალიბდეს შემდეგი რედაქციით:

„ მუხლი 21. სადისერტაციო საბჭოს ფუნქციები და საქმიანობის წესი

1. სადისერტაციო საბჭოს ფუნქციებია:

ა) დოქტორანტების სადისერტაციო თემის დამტკიცებისა და ხელმძღვანელის დანიშვნის თაობაზე გადაწყვეტილებების მიღება;

ბ) სადისერტაციო ნაშრომის შემფასებლების დანიშვნა და დისერტაციის დაცვის თარიღის განსაზღვრა;

გ) სადისერტაციო ნაშრომის ზღვრული მოცულობის, ფორმატისა და გაფორმების ინსტრუქციის დადგენა;

დ) სადისერტაციო კომისიის დამტკიცება;

ე) დოქტორის აკადემიური ხარისხის მინიჭება სადისერტაციო კომისიის დასკვნის საფუძველზე;

2. სადისერტაციო საბჭოს შედგენის, საბჭოს თავმჯდომარის არჩევის წესი და საქმიანობა განისაზღვრება ფაკულტეტის სადისერტაციო საბჭოს დებულებით, რომელსაც ფაკულტეტის საბჭოს წარდგინებით ამტკიცებს უნივერსიტეტის აკადემიური საბჭო.“

11. დებულების 22-ე მუხლი ჩამოყალიბდეს შემდეგი რედაქციით:

„ მუხლი 22. საატესტაციო კომისია

აკადემიური უმაღლესი განათლების საფეხურების - ბაკალავრიატისა და მაგისტრატურის - დამთავრებისას პირთათვის კვალიფიკაციის მინიჭების გადაწყვეტილებას იღებს საატესტაციო კომისია.“

12. დებულების 25-ე მუხლი ჩამოყალიბდეს შემდეგი რედაქციით:

„ მუხლი 25. საგანმანათლებლო პროგრამების შემუშავება, განხილვა და დამტკიცება

1. ფაკულტეტის საგანმანათლებლო პროგრამას შეიმუშავენ ფაკულტეტის შესაბამისი მიმართულების პროფესორები.
2. საგანმანათლებლო პროგრამების განხილვის პროცესი მიმდინარეობს ჯერ პროგრამის პროფილის სასწავლო-სამეცნიერო კათედრაზე/ინსტიტუტში /დეპარტამენტში. გადაწყვეტილება მიიღება ხმათა უმრავლესობით. შემდეგ პროგრამის ხელმძღვანელი/კოორდინატორი საგანმანათლებლო პროგრამას განსახილველად წარუდგენს პროგრამის შემუშავება-განვითარების მიზნით შექმნილ პროგრამულ კომიტეტს, სადაც ყველა დაინტერესებული მხარე (პროგრამის განმახორციელებელი პერსონალი, შესაბამისი პროფილის დამოუკიდებელი სამეცნიერო კვლევითი ერთეულის წარმომადგენელი, სტუდენტი, კურსდამთავრებული, პროფილური თუ არაპროფილური დამსაქმებელი, ფაკულტეტის და თსუ ხარისხის უზრუნველყოფის სამსახურის წარმომადგენელი და სხვ.) პროგრამასთან მიმართებაში განიხილავს შრომის ბაზრის მოთხოვნებს, სტუდენტთა და კურსდამთავრებულთა გამოკითხვის შედეგებს, სტუდენტთა აკადემიური მოსწრების მონიტორინგის შედეგებს, პროფესიულ ასოციაციებთან კონსულტაციების შედეგებს, ადგილობრივ და საერთაშორისო გამოცდილებას. პროგრამის ხელმძღვანელი/კოორდინატორი უზრუნველყოფს კომიტეტის წევრების არგუმენტირებული შენიშვნებისა და მოსაზრებების გათვალისწინებას პროგრამის აღწერილობასა და სილაბუსებში და წარადგენს ხარისხიან, შრომის ბაზრისა და მეცნიერების განვითარების ინტერესებზე ორიენტირებულ თანამედროვე საგანმანათლებლო პროგრამას პროგრამული პროფილის სასწავლო-სამეცნიერო კათედრის/ინსტიტუტის/ /დეპარტამენტის და პროგრამის დაგეგმვა-შემუშავება-განვითარების პროგრამული კომიტეტის სხდომების ოქმებთან ერთად ფაკულტეტის ხარისხის უზრუნველყოფის სამსახურში, რომლის დადებითი დასკვნის შემთხვევაში იგი წარედგინება ფაკულტეტის დეკანს.
3. ფაკულტეტის დეკანი სასწავლო პროგრამებს განსახილველად წარუდგენს ფაკულტეტის საბჭოს.
4. ფაკულტეტის საბჭო განიხილავს პროგრამას და თანხმობის შემთხვევაში უგზავნის მას უნივერსიტეტის ხარისხის უზრუნველყოფის სამსახურს აკადემიური საბჭოს წინაშე წარსადგენად.
5. საგანმანათლებლო პროგრამებს ამტკიცებს უნივერსიტეტის აკადემიური საბჭო.
6. დამტკიცებულ საგანმანათლებლო პროგრამაში ცვლილების შეტანა ხდება პროგრამის დამტკიცებისათვის დადგენილი წესის შესაბამისად.
7. პროგრამის მუშაობისას აღმოჩენილი ტექნიკური ხარვეზების გასწორება ხდება ფაკულტეტის საბჭოს გადაწყვეტილებით.“

13. დებულების 26-ე მუხლის მე-6 პუნქტი ჩამოყალიბდეს შემდეგი რედაქციით:

„ 6. ჰუმანიტარულ მეცნიერებათა ფაკულტეტის ძირითადი საგანმანათლებლო-სამეცნიერო სტრუქტურული ერთეულის - სასწავლო-სამეცნიერო ინსტიტუტის - საქმიანობის წესი განისაზღვრება წინამდებარე დებულებით, რომელიც მტკიცდება თსუ წესდებით დადგენილი წესით.“

14. დებულების 38-ე მუხლის პირველი პუნქტი ჩამოყალიბდეს შემდეგი რედაქციით:

„1. რესურსების მართვის სამსახურის დანიშნულებაა რესურსების ეფექტიანად მართვის საფუძველზე ფაკულტეტის სტუდენტებსა და პერსონალს შეუქმნას სწავლის, შრომისა და სამეცნიერო-კვლევითი მუშაობის ნორმალური პირობები; უზრუნველყოს ფაკულტეტის ბალანსზე არსებული ქონების მფლობელობისა და სარგებლობის ოპტიმალური რეჟიმი; ფაკულტეტის სტრუქტურული ერთეულებისა და თანამშრომელთა უზრუნველყოფა შესაბამისი მატერიალურ-ტექნიკური ბაზითა და ინვენტარით, მატერიალურ ფასეულობათა მიღება-ჩაბარება და მოვლა-პატრონობა მოქმედი კანონმდებლობის დაცვით და სხვ.“

15. დებულების მე-40 მუხლის პირველი პუნქტი ჩამოყალიბდეს შემდეგი რედაქციით:

„1. ჰუმანიტარულ მეცნიერებათა ფაკულტეტზე შესაძლებელია არსებობდეს აკადემიური, ადმინისტრაციული, სამეცნიერო, მასწავლებელთა და დამხმარე თანამდებობები.“

16. დებულების მე-40 მუხლს, პირველი პუნქტის შემდგომ დაემატოს შემდეგი შინაარსის მქონე 1¹ პუნქტი:

„1¹. ამ მუხლის პირველი პუნქტით გათვალისწინებული პერსონალის შეფასება ხორციელდება უნივერსიტეტში მოქმედი რეგულაციების შესაბამისად.“

17. დებულების 41-ე მუხლის პირველი პუნქტი ჩამოყალიბდეს შემდეგი რედაქციით:

„1. ფაკულტეტის აკადემიური პერსონალი შედგება პროფესორისაგან, ასოცირებული პროფესორისაგან, ასისტენტ-პროფესორისა და ასისტენტისაგან.“

18. დებულების 41-ე მუხლის მე-2 პუნქტი ამოღებული იქნეს;

19. დებულების 43-ე მუხლი ჩამოყალიბდეს შემდეგი რედაქციით:

„მუხლი 43. სამეცნიერო-კვლევითი ერთეულების პერსონალი

„ფაკულტეტის სამეცნიერო-კვლევით ერთეულებში, რომლებიც არ წარმოადგენენ ფაკულტეტის დამხმარე საგანმანათლებლო ან დამხმარე სამეცნიერო ერთეულებს, ერთიანდება კვლევითი საქმიანობის განმახორციელებელი პერსონალი“

20. დებულების 46-ე მუხლის პირველი პუნქტი ჩამოყალიბდეს შემდეგი რედაქციით:

„1. ჰუმანიტარულ მეცნიერებათა ფაკულტეტის სტუდენტი არის პირი, რომელიც „უმაღლესი განათლების შესახებ“ საქართველოს კანონით, თსუ-ს წესდებითა და მოქმედი კანონმდებლობით განსაზღვრული წესით ჩაირიცხა და სწავლობს თსუ ჰუმანიტარულ მეცნიერებათა ფაკულტეტის ბაკალავრიატის, მაგისტრატურის, დოქტორანტურისა და ქართულ ენაში მომზადების საგანმანათლებლო პროგრამაზე.“

21. დებულების 46-ე მუხლს, პირველი პუნქტის შემდგომ დაემატოს შემდეგი შინაარსის მქონე 1¹ პუნქტი:

„1¹. ფაკულტეტის პროფესიული სტუდენტი არის პირი, რომელიც კანონმდებლობითა და თსუ-ის შიდა სამართლებრივი აქტებით დადგენილი წესით ჩაირიცხა და სწავლობს პროფესიული საგანმანათლებლო პროგრამაზე.“

22. დებულების 46-ე მუხლის მე-2 პუნქტი ჩამოყალიბდეს შემდეგი რედაქციით:

„2. ფაკულტეტზე მოქმედებს უმაღლესი აკადემიური განათლების სამივე საფეხური - ბაკალავრიატი, მაგისტრატურა, დოქტორანტურა.“

23. დებულების 47-ე მუხლის მე-5 პუნქტი ჩამოყალიბდეს შემდეგი რედაქციით:

„5. მაგისტრატურაში სწავლის გაგრძელების მსურველის (შემდგომში „კონკურსანტი“) საბუთების მიღებას ახორციელებს ფაკულტეტის მიმღები კომისია, რომელიც მტკიცდება ფაკულტეტის დეკანის ბრძანებით.“

24. დებულების 47-ე მუხლის მე-7 პუნქტი ჩამოყალიბდეს შემდეგი რედაქციით:

„7. გამოცდა სპეციალობაში ტარდება წერილობითი სახით. საგამოცდო ნამუშევრები ფასდება 100-ბალიანი სისტემით. გამოცდა ჩაბარებულად ითვლება, თუ კონკურსანტი მიიღებს დადებით შეფასებას (მინიმუმ 51%). სპეციალობის გამოცდაში კონკურსანტთა ნაშრომებს ამოწმებს საგამოცდო კომისია, რომელიც მტკიცდება ფაკულტეტის დეკანის ბრძანებით. საგამოცდო კომისიის წევრი არ შეიძლება იყოს სამაგისტრო პროგრამის ხელმძღვანელი.“;

25. დებულების 47-ე მუხლის მე-10 პუნქტი ჩამოყალიბდეს შემდეგი რედაქციით:

„10. მაგისტრატურაში მისაღები საკონკურსო გამოცდა/გამოცდები ტარდება ფაკულტეტის მიერ (გამოცდა/გამოცდები ტარდება თსუ საგამოცდო ცენტრის ტექნიკური მხარდაჭერით)“.